

Ni Pangulong Dieter F. Uchtdorf

Ika-duhang Manuglaygay sa
Unang Panguluhan



Ang Ani sang Dios

sa ka babayi nga ginhingadlan Christa ang sadto naga-trabaho sa isa ka gamay nga kompanya sang mga binhi. Palangga niya ang iya trabaho. Isa ka ginhalinan sang dako nga katingalahan nga ang tagsa ka gamay nga binhi nga ginabaligya niya may ikasarang nga magmangin isa ka milagroso nga bagay—isa ka carrot, repolyo, ukon indi gani isa ka dako kaayo nga kahoy.

Nanamian si Christa magpungko sa atubang sang iya computer nga nagabaton sang mga order kag nagasabat sang mga pamangkot. Pero isa ka adlaw nakabaton sia sang reklamo nga nagpalibog sa iya ulo.

“Wala man ‘ni ‘gatubo ang mga binhi n’yo,” siling sang kustomer. “Ginbakal ko ini duha na ka bulan ang nagligad pero wala gid may natabo.”

“Gintanom mo bala ini sa maayo nga duta kag ginbunyagan kag ginpaintitan?” Pamangkot ni Christa.

“Wala, pero ginhimo ko ang dapat ko obrahon,” sabat sang kustomer. “Ginbakal ko ang mga binhi. Indi bala, *garantisado* man ini nga magtubo.”

“Pero wala mo ini gintanom?”

“Wala eh. Kay basi mahiguan ang akon mga kamot.”

Ginpamensar ini ni Christa kag nagdesisyong ngap isulat ang mga instruksyon sa pagtanom. Namat-od sia ngap dapat ang una nga instruksyon amo nga: “Kinahanglan ninyo sundon ang mga instruksyon sa pagtanom agud magtubo ang mga binhi. Indi pwede nga ibutang n’yo lang ini sa estante kag maglaum ngap magtulubo ini.”

Wala madugayi isa naman ka reklamo ang iya nabaton.

“Wala man ‘ni ‘gapamunga ang mga binhi n’yo,” hambal sang kustomer.

“Gintanom mo bala ini sa maayo nga duta?” Sabat ni Christa. “Ginsagod mo bala ini sang bunyag kag silak sang adlaw?”

“Huo eh,” siling sang kustomer. “Ginhimo ko ina tannan—pareho gid sa ginsiling sa putos sini. Pero wala gid sing may natabo.”

“Bisan ano wala gid? May nag-ulhot bala sa binhi?”

“Wala gid,” siling sang kustomer. “Ginsunod ko gid ang direksyon kon paano ini itanom. Nagalaum ako ngap makakaon na sang mga kamatis karon sa panyapon. Karon nadismaya gid ako katama.”

“Dali lang gid,” sabat ni Christa. “Buot mo siligon sini mo lang ngap adlaw gintanom ang mga binhi?”

“N’ano ka man,” sabat sang kustomer. “Sang nagligad ko pa ini ngap semana gintanom. Wala man ako nagalaum ngap mamunga ini sa una gid ngap adlaw; naghulat ako. Sugiran ko ikaw, malawig man ang pagbulubunyag kag paghulat-hulat sumugod sadto hasta subong.”

Nahibaluan ni Christa ngap kinahanglan niya magdugang sang isa pa ka instruksyon: “Ining mga binhi nagasunod sa layi sang biology. Kon magtanom ka sang binhi sini ngap aga kag mag-ekspektar ngap makakaon sang kamatis pagkaligad sang isa ka semana, mapaslawan ka gid. Kinahanglan mangin pasensyoso ka kag hulaton ang kinaugali

nga magpatubo sang inyo tanom."

Daw maayo na ang tanan tubtob nakabaton naman si Christa sang isa pa gid ka reklamo.

"Wala gid ako makontento sa inyo mga binhi," umpsa sang kustomer. "Gintanom ko ini pareho sa ginpanugyan sa direksyon sa putos sini. Ginbunyagan ko ini, ginpat-od nga nainitan, kag naghulat tubtob magpalamunga mga ini."

"Ti daw husto man ang tanan mo nga ginhimo," hambal ni Christa.

"Maayo na gani tani," sabat sang kustomer. "Ugaling patola man ang ginpamunga sini!"

"Sa rekord ko diri amo man ina ang binhi nga gin-order mo," siling ni Christa.

"Indi 'ya patola ang gusto ko; gusto ko kalabasa!"

"Daw indi ako kaintiende."

"Gintanom ko ang mga binhi sa kalabasahan—sa gintamnan ko mismo sang mga kalabasa sang nagligad nga tuig. Gindayaw ko ang mga tanom ko kada adlaw, ginahambalan ko sila nga mangin manami sila nga mga kalabasa pila ka adlaw. Pero imbes dalagko, bilog, kag dalag nga mga kalabasa, malagba kag berde nga patola ang nakuha ko. Nga pwerte sa pagkادamo!"

Nahibaluan ni Christa nga ang mga panulin kulang pa kag kinahanglan gid sambiton ang isa ka prinsipy: "Ang binhi nga imo ginatanom kag ang tion sang pagtanom nagadikta kon ano ang imo anihon."

Ang Layi sang Pag-ani

Si Apostoles Pablo nagtudlo parte sa ani sang Dios:

"Dili kamo magtalang; ang Dios indi tiliaw-tiawan: Kay bisan ano ang ginasab-og sang tawo, ina man ang iya anihon.

"Kay ang nagasab-og sa iya kaugalingon nga unod magaani sing kadulungan gikan sa unod; apang ang nagasab-og sa Espiritu magaani sing kabuhi nga dayon gikan sa Espiritu.

"Kag dili kita magpakaluya sa paghimo sing maayo, kay sa nagakaigo nga dag-on magaani kita, kon indi kita pagpunawon" (Mga Taga-Galacia 6:7–9).

Sang sini lang nga tinion, ang Ginuo naghatag sa aton sing dugang nga kaalam kag palanan-awon parte sa sining indi mabali nga layi:

May isa ka layi, nga ginplastar sa langit antes pa gintuga ining kalibutan, nga sa diin naangot ang tanan nga mga bugay—

Kag kon may mabaton kita nga bugay gikan sa Dios, ini tungod sa pagtuman sinang layi kon sa diin ini naangot (tan-awa sa D&C 130:20–21).

Kon ano ang aton gintanom, amo man ang aton anihon.

Ang ani sang Dios may indi malaragway nga himaya. Sa ila nga nagatahod sa Iya, ang Iya bugana nga bugay naga-abot nga "ginsukob nga maayo, dinasok, naligo-ligo, nga nagaawas. . . . Kay sa talaksan nga ginataksan ninyo takson kamo liwat" (Lucas 6:38).

Kon ang dutan-on nga mga binhi nagakinahanglan sang pagpangabudlay kag pagpaumod, amo man ang madamo nga mga bugay sang langit. Indi pwede nga ibutang naton ang aton relihiyon sa higad kag magpaabot sang espirituhanon nga mga bugay. Pero kon magtanom kita kag magpatubo sang mga sulukdan sang ebanghelyo sa matag-adlaw nga kabuhi sang aton pamilya, may dako nga posibilidad nga ang aton kabataan magadako nga nagapamunga sang espirituhanon nga bunga nga may dako nga bili para sa ila kag sa magasunod nga henerasyon.

Ang sabat sang Dios sa aton mga pangamuyo wala pirme nagaabot sa gilayon—kon kaisa daw wala gid gani ini nagaabot—pero nakahibalo ang Dios kon ano ang pinakamaayo para sa Iya mga anak. Sa wala'y duhaduha, isa ka adlaw mas maathag naton nga makita; kag sa sinang adlaw makilala naton ang kaayo kag kaalwan sang langit.

Sa subong, ang aton lalab-uton kag dako nga kasadya amo ang magsunod sa halimbawa sang aton Manunudlo kag Manluluwas kag magpangabuhi sing maayo kag matinlo nga mga kabuhi agud nga ang ginpangako kag malahalon nga pag-ani sang bilidhon nga mga bugay sang Dios mangin aton.

Kon ano ang aton gintanom, amo man ang aton anihon.

Amo ina ang layi sang langit.

Amo ina ang layi sang ani sang Dios.

PAGTUDLO GIKAN SA SINING MENSAHE

Hambali upod sang inyo mga ginabisita kon paano ang ani sang Dios madapat sa mga kaangtanan, pagkahaylo kag panaksihon, sa mga lalab-uton sa trabaho kag pag-eskwela. Sarang ninyo basahon kag binag-binagon ang balaan nga mga kasulatan nga may kaangtanan sa sining layi, pareho sang Mga Hulubaton 11:18; 2 Mga Taga-Corinto 9:6; kag Alma 32. Paisoga

sila nga repasuhon ang nagliligad nga mga lalab-uton kag magpahamtang sang bag-o nga mga lalab-uton agud makab-ot ang matarong nga mga resulta. Buligi sila nga maghimo sang plano sa paggiho suno sa naga-kabagay agud malab-ot ang ila malawig nga tinutuyo.

MGA KABATAAN

Planuha ang Inyo Ani

Ang layi sang Dios sa pag-aní amo nga kon gusto naton ang isa ka butang sa pila ka adlaw, kina-hanglan naton ina obrahan sa karon. Kon gusto naton magpatubo sang hardin, kinahanglan naton magtanom sang mga binhi, bunyagan ini, kag protektahan ini batok sa mga hilamon. Kon indi naton ini paghimoon, wala gid kita sang anihon sa ulihi!

Sa idalom amo ang listahan sang pila ka maayo nga "bunga" nga mahimo gusto ninyo sa inyo kabuhi. Isulat ang pila ka butang nga sarang ninyo himuong sini nga bulan agud mabuligan kamo nga mabaton ining mga bugay.

- Isa ka malipayon nga puluy-an
- Edukasyon
- Maayo nga mga abyan
- Bunyag kag Kompirmasyon
- Panakshion parte kay Jesucristo

© 2014 iya lang sang Intellectual Reserve, Inc. Tanan nga mga kinamatarong ginahuptan. Ginbalhag sa Pilipinas. Petsa sang pagtugot sa Ingles: 6/14. Petsa sang pagtugot sa paglubad: 6/14. Paglubad sang *First Presidency Message, August 2014*. Hiligaynon. 10868 861



Ang Langitnon nga Misyon ni Jesucristo: Mesias

Tun-i sing mainampuon ining materyal kag magpangamuyo agud mahibaloan kon ano ang ipaambit. Paano ang paghangop sa kabuhi kag misyon sang Manluluwas makapadugang sang inyo pagtuo sa Iya kag magabugay sa ila nga inyo ginabantayan paagi sa visiting teaching? Para sa dugang nga impormasyon, mag-log on sa reliefsoociety.lds.org.

Kabahin ini sang sunod-sunod nga mga Mensahe sa Visiting Teaching nga nagapakita sang mga aspeto sang misyon sang Manluluwas.

Ang balaan nga mga kasulatan Nagatudlo sa aton nga sarang kita magpuyo sa presensya sang Dios “paagi sa mga merito, kag kaluoy, kag grasya sang Balaan nga Mesias” (2 Nefi 2:8). Ang *Mesias* “isa ka Aramaic kag Hebrew nga tinaga nga buot silingon ‘ang ginhaplas.’ Sa Bag-o nga Katipan si Jesus gintawag nga Cristo, nga amo ang Griyego nga katumbas sang *Mesias*. Buot silingon ang pinili nga Propeta, Pari, Hari, kag Manunubos.”¹

Si Elder Jeffrey R. Holland sang Korum sang Napulo’g Duha ka mga Apostoles nagpanaksihon: “Nakahibalo ako nga [si Jesucristo] amo ang Isa nga Balaan sang Israel, ang Mesias nga magakari liwat sa pila ka adlaw sa perpekto nga himaya, agud maghari sa duta bilang ang Ginuo sang mga ginuo kag Hari sang mga hari. Nakahibalo ako nga wala na sing iban pa nga ngalan nga ginhatac sa idalom sang langit nga paagi sa sini ang [lalaki ukon babayil] mahimo nga maluwas.”²

“[Si Jesucristo] amo ang Manluluwas kag Manunubos sang

kalibutan,” siling ni Pangulong Dieter F. Uchtdorf, Ika-duhang Manuglaygay sa Unang Panguluhan. “Sia ang ginsaad nga Mesias. Nagkabuhi sia sang perpekto nga kabuhi kag nagpasag-uli para sa aton mga sala. Mangin yara sia pirme sa aton tupad. Pagaawayon Niya ang aton mga away. Sia amo ang aton paglaum; Sia amo ang aton kaluwasan; Sia amo ang dalan.”³

Dugang nga Balaan nga mga Kasulatan

Juan 1:38–41; 4:25–26, 40–42; 2 Nefi 6:13; 25:16–17

Gikan sa Balaan nga mga Kasulatan

Ang babayi nga mga disipulo ni Cristo nangin mga saksi sang Iya nga papel bilang Mesias. Si Maria Magdalena isa sadto ka disipulo ni Jesucristo. Sia amo ang una nga nakita “sang bato nga nakuha na sa lulubngan” sa aga sang Pagkabanhaw ni Cristo. Sia “nagtindog nga nagahibi sa gwa sang lulubngan” matapos madiskubrehan ang Iya lawas nga wala na sa lulubngan.

Dayon “nagliso sia kag nakita niya si Jesus nga nagatindog, apang wala sia makakilala nga si Jesus yadto.

“Si Jesus nagsiling sa iya, ‘Babayi, ngaa bala nagahibi ka? Sin-o ang imo ginapangita? Sia, nga nagahunahuna nga si Jesus amo ang manugbantay sang katamnan, nagsabat sa iya, ‘Ginuo, kon ikaw ang nagkuha sa iya, sugiri ako kon diin mo sia ginbutang, kag kuhaon ko sia.

“Si Jesus nagsiling sa iya, ‘Maria’. Nagliso sia kag nagsiling sa iya sa Hebrew, ‘Rabboni’ (nga kon sayuron Manunudlo).” Nakilala ni Maria nga indi Sia ang hardinero kundi si Jesucristo, ang Mesias. (Tan-awa sa Juan 20:1–17.)

MGA TANDA

1. Guide to the Scriptures, “Messiah”; scriptures.lds.org.
2. Jeffrey R. Holland, “The Only True God and Jesus Christ Whom He Hath Sent,” *Liahona*, Nov. 2007, 42.
3. Dieter F. Uchtdorf, “The Way of the Disciple,” *Liahona*, Mayo 2009, 78.

Binagbinaga Ini

Ngaa bala importante nga mahangpan ang papel sang Manluluwas bilang ang Mesias?